



## **Communicaziun da medias digl cumegn da Surses (nr. 15-2021)**

### **Surses: Igl project dalla tgesa da scola primara a Savognin è en zap pi gliunsch**

**La radunanza communalà ò decidia cun gronda maioritad da sottametter agl cumegn d'urna la proposta da conceder igl credit da radond 22 miu. francs per la construcziun nova dalla tgesa da scola primara a Savognin incl. la sanaziun digl bietg polivalent. An cumbinaziun cun la construcziun dalla tgesa da scola vign proponia da realisar er ena halla da parcar per radond 2 miu. francs. Ultra da chegl ò la radunanza communalà approvo igl preventiv 2024 e fixo igl pe da taglia communal pigl onn tgi vign.**

Cun fitg gronda pluralitad ò la radunanza communalà accepto igl project davart la construcziun nova dalla tgesa da scola primara a Savognin incl. la sanaziun digl bietg polivalent cun deliberar igl affar per mangs digl cumegn d'urna cun la proposta d'approvar en credit d'impegn da radond 22 miu. francs. Tenor decisiun dalla radunanza communalà duess - an cumbinaziun cun la tgesa da scola - neir construeida er ena halla da parcar sot la piazza da scola. Per chella halla da parcar duess igl cumegn d'urna approvar en ulteriour credit da radond 2 milliuns francs.

La construcziun dalla tgesa da scola è necessaria perche gl tgi igl bietg existent, tgi datescha digl onn 1954, adamplescha betg ple las pretensiuns d'en'instrucziun moderna e porscha betg ple plaz avonda per la scoletta ed igl scalem primar.

Siva tg'igl suveran veva decidia igl 2021 da construeir ena tgesa da scola nova agl li dalla scola existenta, ò la suprastanza communalà incumbenzo igl biro Architekt Ruch & Partner Architekten da Son Murezza d'elaborar igl project da construcziun tgi è nia preschento a caschung dalla radunanza communalà.

Sot la resalva tg'igl cumegn d'urna conceda igl credit necessari, è gl previa da scumanzar cun las lavours la stad 2024. Durant la fasa da construcziun nissan las ampresas 4 classas primaras translocadas a Salouf, ainten l'antierioura tgesa da scola. La scoletta vign manada ainten la Villa Aurora a Savognin e la 5 e 6avla classa primara vignan manadas scu anfignen ossa ainten la scola superioura a Savognin. Siva la terminaziun dallas lavours igl 2026 vignan la scoletta e las seis classas primaras manadas ainten la tgesa da scola nova a Grava.

### **Igl preventiv 2024**

Tar antradas e sorteidadas da radond 36.5 milliuns francs prevei igl preventiv en surple d'antradas da radond 35'500.00 francs. Las investiziuns bruttas montan a 13'854'000.00 milliuns francs (investiziuns nettas 10'904'500.00 milliuns francs) e pertotgan cunzont l'infrastructura communalà, vot deir la sanaziun digl provedimaint d'ava e la dismessa d'ava persa, la sanaziun da veias communalas, l'adattaziun d'ena farmada da posta a Savognin ed a Tinizong alla basa dalla lescha davart l'egualitad da persungas cun impedimaint, scu er en'amprema etappa dallas lavours per la construcziun nova d'en luvratori communal a Savognin.

An connex cun igl preventiv è er nia preschento igl plan da finanzas 2025-2027.

### **Fixaziun digl pe da taglia**

Analog agl onn passo ò la radunanza communalà decidia sainza discussiun da fixar igl pe da taglia per la taglia d'antrada e da facultad digl cumegn da Surses pigl onn 2024 sen 90% dalla taglia cantunala simpla.

### **Ulteriouras decisiuns**

Sainza discussiun ò la radunanza communal decidia da desister da fixar restricziuns pertutgont las quotas per la vendita d'immobiglias a persungas digl exterior pigl 2024, conform alla practica actuala.

Pinavant ò la radunanza accepto la dumonda d'en pêr indigen da pudeir cumpar digl cumegn la parcella da biagier nr. 8264, Davos-Clavo, a Salouf per construeir ena tgesa d'abitar (abitaziun primara).

Ulteriouras infurmaziuns dat igl mastral Leo Thomann (telefonign 079 405 96 73)

Tinizong, igls 12 da december 2023